

Morning Regional Dogri News Bulletin, 24 April 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- लोकसभा चुनां दे दुए गेड़ लेई चुनां प्रचार अज्ज संझा खत्म होई जाग। इस गेड़ तैहत जम्मू-कश्मीर दी जम्मू-रियासी लोकसभा सीट लेई अतरुं शुक्रवारें वोट पोआए जाडन।
- विदेश मंत्री डॉ. एस जयशंकर होरें आखेआ ऐ जे भारतीयें दी सुरक्षा ते भलाई बेहतरी, सरकार दी सब्बनें शा पैहली तरजीह ऐ।
- सेना प्रमुख जनरल मनोज पांडे होरें आखेआ ऐ जे राश्ट्रीय हितें दी रक्षा लेई सेना कोई बी लड़ाई लड़ने कोला बी नेई झकोग।
- आईपीएल च कल लखनऊ जायंट्स नै चेन्नई सुपर किंग्स गी 6एं विकेटें कन्नै हराया। अज्ज दिल्ली कैपिटल्स दा मकाबला गुजरात टाइटन्स कन्नै होग।

<><><><><><>

Last Day Campaigning

लोकसभा दे दुए चरण दे चुनांs लेई प्रचार अज्ज मुक्का करदा ऐ। इस गेड़ तैहत 13 राज्यें ते केंद्र शासित प्रदेशें दिएं कुल 89 लोकसभा सीटें लेई 26 अप्रैल गी वोट पाए जाडन। जम्मू-कश्मीर च इस गेड़ तैहत शड़ी इक्क जम्मू रियासी सांबा लोकसभा सीट लेई मतदान होग। कुल त्रऊं जिलें च फैले दे इस हल्के च कुल 17 लक्ख 81 जहार 545 मतदाता न जिंदे चा 9 लक्ख 21 जहार 462 मर्द, 8 लक्ख 60 जहार 55 महिलां ते 28 ट्रांसजेंडर न।

इस निर्वाचन क्षेत्र च 2 जहार 416 मतदान केंद्र बनाए गेदे न। जम्मू सीट थमां 2014 ते 2019 च बीजेपी दे मेदवार जुगल किशोर शर्मा होरें जित्त हासिल कीती ही ते ओह हून त्री बारी चुनां मैदान च न। इस सीट लेई उआं ते 22 मेदवार चुनां मैदान च न पर मुख मुकाबला बीजेपी दे जुगल किशोर शर्मा ते कांग्रेस दे रमण भल्ला हुंदे बश्कार ऐ। सब्बै पार्टियां ते आजाद मेदवार मते शा मते मतदाताएं गी अपने हक्कै च करने लेई प्रचार च रूज्झे दे न जेड़ा अज्ज संझा मुक्की जाग। होर जानकारी कन्नै आकाशवाणी दे जम्मू संवाददाता।

<><><><><><>

Omar PDP

नेशनल कांफ्रेंस दे नेता ते साबका मुखमंत्री उमर अब्दुल्ला होरें दोष लाया ऐ जे पीडीपी, भारतीय जनता पार्टी दी सी- टीम बनी गेदी ऐ ते जम्मू-कश्मीर दे लोक साम्प्रदायिक ताकतें गी हराने लेई इंडी गठबंधन आली बक्खी दिक्खा करदे न। दक्खनी कश्मीर दे कोकर नाग जेड़ा जे अनंतनाग राजौरी लोकसभा सीट दा हिस्सा ऐ, उत्थे एन.सी दे मेदवार दे हक्कै च चुनां प्रचार करदे होई ओमर होरें आखेआ। जे जम्मू-कश्मीर दे विकास ते खुशहाली लेई लोकें गी इंडी गठबंधन दे मेदवारें दे हक्कै च वोट पाना लोड़चदा।

<><><><><><>

BJP-Local

जम्मू कश्मीर प्रदेश बीजेपी दे प्रधान रविंद्र रैना होरें दावा कीता ऐ जे जम्मू रियासी लोकसभा सीट पर कांग्रेस दी जमानत जब्त होने आली ऐ।

कल आरएसपुरा दे बक्ख-बक्ख इलाकें च जनसभाएं गी संबोधित करदे होई उनें लोकें गी बीजेपी दे मेदवार जुगल किशोर शर्मा हुंदे कन्नै हक्कै च वोट करने दी अपील करदे होई आखेआ जे कांग्रेस, नेशनल ते पीडीपी नै लोकें दा समर्थन हासल होने दे बावजूद लोकें दी भलाई बेहतरी लेई किश बी नेई कीता ते हून इक बारी परतिए जम्मू-कश्मीर दे लोक इनें पार्टिएं गी नकारने जा रदे न।

<><><><><><>

Congress Local

जम्मू-कश्मीर प्रदेश कांग्रेस नै बीजेपी नेताएं दे हालिया बयाने गी उंदी बाँखलाहट करार दिंदे होई आखेआ ऐ जे पैहले गेड़ दे चुनाएं दे रूझान दिक्खिए बीजेपी डरी गेदी ऐ ते पार्टी महासचिव ते महिला नेता नम्रता शर्मा होरें कल जम्मू च आखेआ जे बीजेपी दे नेताएं दे बयान सुनिए इयां लगदा ऐ जे बीजेपी सेई करी गेदी ऐ जे इनें लोकसभा चुनाएं च ओदे पैरें हेठा जिमी खिसकने आली ऐ इस करिए ओ नफरत फैलाने आली सियासत खेडने पर आई गई ऐ।

<><><><><><>

SVEEP-Jammu

जम्मू दे जिला प्रशासन पाससेआ संध्या स्वीप यात्रा दा सरिस्ता कीता गेआ। एह वजारत रोड थवां जम्मू दे पराने शैहर दी बक्ख-बक्ख थाहरें थवां हुंदे होई लंघी।

इस दौरान 26 अप्रैल गी होने आले मतदान च हिस्सा लैने लेई नागरिकें गी खासतौर पर युवाएं गी अपील कीती गईं। आकाशवाणी संवाददाता कन्नै गल्ल करदे होई जम्मू दे जिला चुनांs अधिकारी सचिन कुमार वैश्य होरें आखेआ।

<><><><><><>

EAM

विदेश मंत्री डॉ. एस जयशंकर होरें आखेआ ऐ जे भारत लेई राष्ट्र पैहले ते वासुदेव कुटुम्बकम इक्कै गल्ल ऐ ते इंदा इक गै मकसद ऐ। उनें गलाया जे भारतीयें दी भलाई बेहतरी ते सुरक्षा सरकार दी पैहली ते प्रमुख प्राथमिकता ऐ। हैदराबाद च भारत दी विदेश नीति बारे इक लैक्चर च बोलदे होई विदेश मंत्री होरें आखेआ जे भारत ग्लोबल साउथ दी आवाज बनेआ ऐ ते विश्व वंधु स्हाड़ी विदेशी नीति दी मुंडली विचार धारा ऐ। उनें आखेआ जे मुल्ल दी विदेश नीति च बड़ा मता बदलाव आया ऐ। भारत गी लेइए दुनिया भरै दे नजरिए च बदलाव आया ऐ।

<><><><><><>

COAS-War

सेना प्रमुख जनरल मनोज पांडे होरें आखेआ ऐ जे जित्थे तगर राष्ट्रहित दी गल्ल ऐ तां सेना एहदे लेई लड़ाई थवां बी पिच्छे नेई हटोग। एह गल्ल उनें दिल्ली च इक समारोह च बोलदे होई आकखी।

उनें आखेआ जे हाल दे भू राजनैतिक दृष्टिकोण गी दिक्खदे होई इक आधुनिक तकनीकी तौर पर सक्षम ते आत्मनिर्भर भविक्ख आस्तै सेना गी मजबूत ते तयार होना ऐ। उनें आखेआ जे सेना रक्षा विनिर्माण क्षेत्र च आत्मनिर्भरता दे राएं आर्थिक ते सैन्य क्षमताएं गी आकार देआ रदी ऐ। उनें गलाया जे जित्थे आर्थिक शक्ति मुख्य दे विकास दा स्रोत ऐ, उत्थे गै सैन्य ताकत मुख्य दे बक्ख-बक्ख चाल्ली दे हितें दी रक्षा आस्तै सक्षम बनांदी ऐ।

<><><><><><>

Rajouri-Reward

जम्मू-कश्मीर पुलस नै लश्कर-ए-तैयबा दे आतंकवादी अबु हमजा गी फगड़ाने च मदद करने आले ओदी जानकारी देने आले गी 10 लक्ख रपे दा ईनाम देने दी घोषणा कीती ऐ। एह आतंकवादी राजौरी शादरा शरीफ दे राँहने आले सरकारी कर्मचारी मोहम्मद रजाक दी हत्या दे पिच्छे दस्सेआ जा रदा ऐ। मोहम्मद रजाक दी हत्या औदे घर दे बाहर कीता गई ही जिसलै ओह मुकामी मसीत थवां परतोआ रदा हा। ओहदा भा जेड़ा टेरीटोरियल आर्मी च ऐ, ओह हमला थवां बचिए नस्सने च कामयाब रेया। इत्थे एह दस्सना लाजमी ऐ जे मोहम्मद रजाक दे पिता दी बी आतंकवादिएं 2003 च हत्या करी दिती ही। हमदर्दी दे आधार पर मोहम्मद रजाक गी सरकारी नौकरी दिती गई ही।

<><><><><><>

Police Drugs

नशा तस्करें खलाफ अपना अभियान जारी रखदे होई जम्मू पुलसै आप्रेशन संजीवनी तैहत जम्मू दे बाहरले इलाके राजीव नगर च छापेमारी कीती। बाहु फोर्ट पुलस थाने हेठ पौंदे इस इलाके च छापे दौरान 13 लोकें गी गिरफ्तार कीता गेआ ऐ। जम्मू पुलसै अपनी इक सोशल मीडिया पोस्ट च जानकारी दिती जे गिरफ्तार कीते गेदे लोकें गी सेंट्रल जेल भेजी दिता गेआ ऐ।

<><><><><><>

Difence-Missile

कल रणनीतिक बलें दी कमान दी अगुवाई च मध्यम दूरी दी बैलिस्टिक मिसाइल दे नमं रूप दा सफलता कन्नै प्रक्षेपण कीता गेआ। रक्षा मंत्रालय नै इक बयान च आखेआ ऐ जे इस यूजर लांच कन्नै कमांड दी परिचालन क्षमता साबित होई गई ऐ ते नमी तकनीकें गी प्रमाणित कीता गेआ ऐ।

<><><><><><>

BJP-Ladakh

भारती जनता पार्टी नै लद्दाख लोकसभा सीट सोयां अपना मेदवार बदली दिता ऐ। पार्टी नै मौजूदा सांसद जामियांग सेरिंग नामग्याल हुंदी थाहर ताशी गैल्सन होरें गी अपना मेदवार घोषित कीता ऐ।

<><><><><><>

RBI

भारतीय रिजर्व बैंक नै आखेआ ऐ जे भारत च रास पूंजी लाने दी बधदी मंग उत्साह बधाने आला बपार क्षेत्र ते उपभोक्ताएं दा सकारात्मक रूझान दे चलदे अस्सल सकल घरेलू उत्पाद यानि जीडीपी च बाददे दे आसार नजरी आँदे न। रिजर्व बैंक नै अर्थ बवस्था दी स्थिति विषय कन्नै अपने इक लेख च आखेआ ऐ जे उपभोक्ताए मुल सूचकांक पर आधारित महंगाई दर पिल्दे दउं महीने दी औसतन 5 इशारिया 1 प्रतिशत दे बाद मार्च म्हीने 4 इशारिया 9 प्रतिशत दर्ज कीती गई ऐ।

<><><><><><>

IPL

आई.पी.एल क्रिकेट मैच च लखनऊ सुपर जायंट्स नै जंदी रातीं चेन्नई दे एम.ए स्टेडियम च खेड्ढे गेदे इक मैच च चेन्नई सुपर किंग्स गी 6 विकटें कन्नै हराई दिता। लखनऊ दी टीम नै 211 रन्जें दा पिच्छा करदे होई 19 ओवर ते त्रै गेंदें च चउं विकटें दे नुकसान पर 213 रन्ज बनाए। मार्क्स स्टानिस दी अगुवाई च सुपर जायंट्स गी उंदी शानदार 63 गेंदगें च 124 रन्जें कन्नै जित्त हासिल करने च मदाद थहोई। एहदे थमां पैहले बल्लेबाजी करदे होई चेन्नई नै तय 20 ओवरें च चउं विकटें दे नुकसान पर 210 रन्ज बनाए। कप्तान रितुराज गायकवाड नै 60 गेंदें च 108 रन्जें कन्न्े आईपीएल च दुई सैंचुरी बनाई। मौजूदा समें च अंक तालिका च लखनऊ दी टीम चौथे पायदान ते चेन्नई दी टीम पंजमीं थाहरै पर बनी दी ऐ। अज्ज दिल्ली कैपिटल्स दा मुकाबला गुजरात टाइटन्स कन्नै होग। एह मैच अज्ज संझा साड्ढे 7 बजे दिल्ली दे अरुण जेटली स्टेडियम च खेड्ढेआ जाग।

<><><><><><>